

TE HEEHURAA API

I neia i te piha neneiraa na te Ekalesia a Iesu Mesia i te Feia
Mo'a i te Mau Mahana Hopea Nei i Papeete, Tahiti,
i te mau fenua Sotaiete, i te mau avae atoa.
Te hoo e piti farane i te matahiti hoê.

Nu. 2.

Febuare 1930.

Mat. 24.

*"E tenu na, ia oaoa to outou aau, e e haamana'o e, e
mea tiama outou ia rave noa'tu i tei au i to outou hinaaro—ia
rave i te e'a o te pohe mure ore, e aore ra, i te e'a o te ora
mure ore."* (II Nephi 10: 23)

Te Faaroo no te Feia Mo'a Mau.

Ua iritihia teie nei parau na roto mai i te buka: "Te Hiro'a Faarco i
papaihia e Tamate Aposetolo; Faaauhia ei reo Tahiti e Elita.

HIRO'A FAAROO 11. *Te haamori nei matou i te
Atua Mana-hope mai tei au i te aau nei, e e faatia'tu hoi ia
na reira atoa te taata atoa ia haamori, noa'tu te huru, e te
vahi, e te mea ia ratou i hinaaro ra.*

UIRAA 1. Eaha te haamoriraa?

P. Te haamoriraa ia te faaturaraa aau, na roto i te
aroha, i te hoê mea i manaôhia e au ia' na ia farii i taua fa-
aturaraa ra. Aita te haamoriraa i faatiahia i nia iho i te hoê
mau peu i ravehia; no te mea ua n'henehe i te taata ia haa-
meri mau i roto i to'na aau anaé, mai te faahiti-ore-raa i te
hoê parau, e aore hoi te tuuraa i te turi i raro.

Uiraa 2. Ua faatiahia to te taata hinaaro i te haamori atu i nia i te aha?

P. Ua haamori te taata mai te au i to'na ite i te mea ta'na e haamori atu nei. E na to'na ite i te tiaraa o te mea i haamorihia e faatia i te haamoriraa, oia hoi: mai te mea aita te taata i ite papu i te huru o te mea ta'na e haamori atu nei, aita iho â oia e haamori ma te aau faaroo i roto i te haamoriraa mau.

Parau Tauturu: Ua nehenehe ia parau e, te haamori nei te mau etene i to ratou mau atua mai te haamoriraa mau; no te mea ua faatiahia to ratou haamoriraa i nia i to ratou ite, e te haamori nei ratou mai te au i to ratou ite. Area râ, eiaha tatou e manaó te reira ia te haamoriraa tia, e tamata râ tatou i te haamaramarama ia ratou na roto i te haapiiraa'tu i te mau mea no te evanelia, e ia tae te mahana no to ratou ite papuraa i te Atua mau ra, nehenehe ia tatou ia parau e, te haamori nei ratou i te Atua mai te haamoriraa mau e te tia atoa hoi.

Uiraa 3. E haamoriraa mau anei ia mai te mea ua ravehia te reira na roto i te puai e te taparu noa?

P. Aita roa. Ua nehenehe i te taata ia rave i te mau peu no te haamoriraa, e faahiti noa i te parau moá, area râ e ere te reira te haamoriraa mau, maori râ no roto mau ia i te aau no te taata; e aita atoa te reira huru pure e tae atu i te Metua maori râ ua haapao te taata i Ta'na ra mau parau e Ta,na ra mau ture. No reira ua riro te haamoriraa taparuhia ei mea haavare i mua i te Atua e ua rave te taata i te hara no taua haavare ra.

Uiraa 4. E mea nahea te tapearaa i te tiamâ no te haamoriraa i mutaa ihora?

P. I te mau tan atoa ua hurihia te mau ino atoa i nia ia ratou o tei ore i haapao i te huru haamoriraa na te pae rahi. E i roto i te Ekalesia ta Iesu i faatia ua itéhia te teo-

teo e ua hinaaro ratou, to roto, i te faateitei ia ratou iho i nia aé i to rapae. Na ratou atoa o te ore i haapao i te Mesia i huri noa te mau hamani-ino-raa i nia i te Feia Moá, no te mea te tiaturi ra ratou i to ratou teiteiraa; no te mea e huaai ratou no Aberahama. A hió i te Ioane 8:32-45.

Na muri mai ia Iesu ua hamani-ino-noa te mau arii i te feia tei ore i haapao i te haapaoraa o te arii ra.

Uiraa 5. Ua faatia anei te parau papai i te tiamâ i roto i te haamoriraa?

P. Oia mau, ua na reira te parau papai. I te mau taime atoa ua faaite noa Iesu i te aroha i te taata'toa. "Te parau atu nei râ yau ia outou, E aroha'tu i to outou mau enemi; e faaora'tu i tei tuhi mai ia outou: e hamani maitai atu i te feia i riri mai ia outou; e pure hoi i te feia i parau ino mai e tei haamani ino mai ia outou; ia riro outou ei tamarii na to outou Metua i te ao ra; te faahiti nei hoi oia i to'na mahana i nia i te ino e te maitai, e te haamairi mai nei oia i te ua i nia i te parau-tia e te parau-tia ore. (Mataio 5:44,45) Ua faauehia te mau aposetolo ia haamaitai ratou i te utuafare atoa ta ratou i tapae ai. E mai te mea râ aita ta ratou parau i fariihia e faautuahia ia taua utuafare ra; area râ no te mahana hopea te reira utua. Ua faaherehere atoa Oia i te ino i roto i to'na parabole no te sitania e te sitona, (Mataio 13:24-30); no te mea ua ite oia i te paruparu no te maitai e i te hopea a papu ai te maitai e te ino ua nehenehe ia huri i te ino i roto i te auahi.

Parau Tauturu: E rave rahi te mau taata tei manaó e, ua tia te hamani ino-raa i to te tahi haapaoraa, e ua faatia atoa ratou i te reira manaó no nia i te parau ta Paulo i parau maira e: "Mai ta matou â hoi i parau aénei, e teie hoi au a parau faahou, Ia aó atu te hoé i te Evanelia ia outou, maori râ i tei fariihia e outou na, ia riro ia oia ei anatema." (Ga-

latia 1:9) Aita râ ratou i haamanaó i te parau tei faaite maira e, tei te Atua te faautuaraa'tu. A hió i te Deuteronomi 32:35; Roma 12:19: Hebera10:30.

Ua faatia atoa vetahi ê i to ratou hamani-ino-raa i nia e te irava te na ô mai e: "Ia haere noa mai te hoé taata orometua ia outou na, e ere teie ta'na parau haapii mai, eiaha i faarii atu ia'na i roto i to outou mau fare, eiaha e parau atu ia'na e, Ia ora na i te haereraa. O tei parau atu hoi ia'na e, Ia ora na i te haerea, ua amui atoa'tu ia ia'na i ta'na ra parau iino." (II Ioane 10-11) Aita râ i itehia te parau tei faatia i te hamani-ino-raa; maori râ eiaha e farii ia ratou o tei patoi noa i te parau mau no te oraraa a Iesu. Aita te taata i faauehia ia haapao oia ia ratou o tei ore i faaroo ita'na iho haapaoraa, maoti râ te vai ra te tahi parau mau i roto i ta taua taata ra haapaoraa.

Uiraa 6. Ua riro anei te faatiaraa ei fariiraa?

P. Aita roa. Ua faatia te Ekalesia a Iesu Mesia i te Feia Moá i te Mau Mahana Hopea Nei i te mau haapaoraa'toa e aita hoi matou e hamani ino atu i te hoé; aita râ matou e farii i ta ratou mau peu, e aita hoi matou e faatia i te manaó e, e vai atura te tahi Ekalesia a Iesu Mesia, maori râ te Moromona.

Parau Tauturu: Tei te huru o te taata ia manaó e, aita atu e haapaoraa maitai maori râ to'na iho, e aore râ ua manaó oia e, aita e huru-ê-raa i ropu i te mau haapaoraa; e ua tia ratou atoa i ta ratou mau haapiiraa atoa, e noa'tu te haapaoraa e tae ratou atoa i te basileia o te Atua ra. E ere râ te reira te feruriraa maitai, no te mea te vai ra te maitai i roto i te mau haapaoraa atoa, ua faatiahia to ratou vairaa no te reira maitai, area râ te vai nei te hoé anaé haapaoraa a Iesu Mesia i nia iho i te ao nei.

Ua faahapa te peropheta ra o Iosepha Semita i te taata tei haamani ino ia vetahi ê no to ratou faaroo i te tahi haapa-

oraa ê, e ua parau maira oia e, ua tia ia tatou ia faatia i te feia haamori idolo ia na reira ratou ma te peapea ore; area râ tei te mau Cherisitiano atoa te haapiiraa'tu ia ratou ia ite ratou i te parau mau a faafariu mai i te Mesia, eiaha râ e rave i te reira na roto i te puai e te haamani-ino-raa'tu.

Ua faaoromai noa te Atua i te mau hara o te taata, eaha e ore ai tatou atoa e faaoromai i te hape no vetahi ê? Ua horoahia mai to te taata tiamâ ia rave oia i te mea ta'na e hinaaro, tei ia'na iho te utua no taua raveraa ra.

Uiraa 7. E mea nahea te faautuaraa i te taata?

P. E faautuahia te taata mai te au i ta'na ohipa. (Ioba 34:11: I Korinetia 3:8) No reira eita te taata atoa e farii i te utua hoé, e eita atoa ratou e ô paatoa i roto i te parahiraa hoé i roto i te basileia o te Atua ra. E horoahia mai râ te parahiraa, e aore râ te basileia e au maitai no te ohipa ta tatou i rave i teie nei ao. Mai te au i te parau i parauhia ra i roto i te Uiraa 7 no te hopea i te Hiroa 10, e tia-faahou mai te etene i roto i te tia-faahou-raa matamua, eiaha râ tatou e manaó e, e farii ia ratou i te parahiraa hanahana roa mai to te feia haapao e farii ra, e farii râ ratou i te parahiraa ia au i ta ratou ohipa maitai.

Uiraa 8. Ehia tufaa i roto i te ao ra?

P. E toru tufaa rahi, oia hoi: te Tiretiera, te Teretetiera, e te Tireti.

Parau Tauturu: Te na ô maira Iesu e: "E rave rahi te parahiraa mau i te fare o tau Metua ra: ahiri aita ra, ua parau atu ia vau ia outou. Te haere nei au e haamaitai i te hoé vahi no outou." (Ioane 14:2,3) Ua tanturu atoa Paulo i te reira manaó maori râ ua huru hape te irítiraa i te reó Tahiti: "Te mau mea hoi o te raí e te mau mea o te fenua, e anaana ê ra to te mau mea o te raí, e huru ê to te mau mea o te fenua nei. E anaana ê to te mahana, e anaana ê to te marama e anaana ê to te mau fetia: e huru ê hoi to te tahi fetia i to

te tahi i te anaana. Oia atoa te tia-faahou-raa o tei pohe ra, i ueuehia ei mea tahuti noa, e faatiahia ma te etaeta: "(I Korinetia 15:40-42)

I teie nei tau ua horoahia maira te tahi maramarama no te reira, o tei haapapu mai i na tufaa e toru i faaineinehia ei parahiraa no te feia no tei nei ao. E tei raro roa aé i taua na tufaa ra te parahiraa o te Tamaiti Pohe.

(E Tuatihia teie nei parau.)

Te Taivaraa

I roto i te vea no te avae Tenuare, ua taió tatou i te huru o te tiaraa o na Ekalesia e piti, oia hoi te Ekalesia Katolika Roma, e te Ekalesia Heleni. I teie nei râ, e hió tatou i te huru i te tiaraa o te Ekalesia Porotetani. Eita e nehenehe ia tatou ia parau e, e hoé noa iho Ekalesia Porotetani, no te mea, te vai nei ta'na mau tufaa, oia hoi, ua rau te huru o te mau Ekalesia no roto mai ia'na. I rotopu i ta'na mau Amaa te vai nei te hoé, oia hoi te Ekalesia Baratanane, parauhia te "Episcopal Church of England". Te parau nei ratou e, ua roaa to ratou mana no o mai i te mau Aposetolo. Te faaite mai nei te mau parau tuatapapa ra e, ua haamata to ratou Ekalesia i te tau no Henere VIII, e ua faatoroahia teie nei Arii e te Pope no te Ekalesia Roma. E mai te mea, oia mau ta ratou parau, e mai te mea tei ia ratou te mana no te mau Aposetolo, te faatia nei ratou i te Ekalesia Katolika Roma. Noa'tu te titauraa o te Ekalesia Porotetani, te vai nei ta'na faaiteraa i roto i te buka, "Against the Perils of Idolatry", papaihia e taua Ekalesia ra, e ua fariihia e ratou ei tumu no to ratou taa-ê-raa i te Ekalesia Roma. Te na ô maira taua buka a ratou ra e, "Ua topa te Ekalesia Roma i roto i te mau haamoriraa idolo, e ua faaruehia ratou e te Atua, e aita roa ta ratou e mana

faahou''. Ua faaitehia teie nei parau i te api 216 no taua buka ra.

Mai te mea, e parau mau ta te Ekalesia Porotetani i parau, e mai te mea, ua faarue-mau-hia te Ekalesia Katolika, nohea mai to te Ekalesia Porotetani mana.

A taió ai tatou i te mau parau i nia nei, e ui paha tatou ia tatou iho, "Ua faatia mau anei Iesu ei Ekalesia e ua haapii anei Oia i te parau mau, ei haamaitairaa i te mau taata o te faaroo e o tei farii i taua mau parau ra. A taió tatou i roto i te Mataio i te pene 18, "E ia hamani ino to taeae ia oe ra, e haere, e faaite atu ia'na i ta'na hapa **** Ia ore ra oia ia faaroo ia oe ra, a aratai atoa'tu oe i te hoé e ia toopiti hoi, ia papu i te mau parau atoa i te vaha o na ite toopiti e tootoru ra. E ia ore oia ia faaroo ia raua, a faaite atu i te Ekalesia; ia ore ra oia ia faaroo i te Ekalesia ra, ia riro noa'tu oia ia oe mai te etene e te telona." Te parau teie ta Iesu i parau no te Ekalesia Ta'na i faatia, tei ia ratou te mana ia haava i te mau taeae e ia faaite ia ratou e, o vai te tia e o vai te hapa, e ia ore ratou ia farii i te reira, e hurihia ratou i rapae, "ia riro noa'tu oia ia oe mai te etene e te telona". Te faaite atoa mai te Faufaa Api e, ua maiti Iesu i na taata e 12 ia haapii atu i te mau taata atoa e babetizo ia ratou e horoa'tu ia ratou i te mana o te Varua Maitai. (Mataio 10) Ua maiti atoa Oia te tahi mau pipi e hitu ahuru ra, ia tauturu ratou i na Aposetolo e 12 Ta'na i maiti. (Luka 10)

I muri aé, te faaite ra Paulo i te huru o te Ekalesia i faatiahia e te Mesia, "E ua haapao Oia i te tahi pae ei Aposetolo; e te tahi pae ei Peropheta; e te tahi pae ei haapii Evanelia; e te tahi pae ei Tiai e ei Orometua; ei faaanu i te feia mo'a i te ohipa ra e Orometua. ia tupu i te ite maitai i te tino o te Mesia ra: (te Ekalesia) ia riro tatou atoa nei ei taata paari, i te faaroo hoé e te ite hoé i te Tamaiti a te Atua ia tae te faito ra i te i o te Mesia i te rahi. (Eph. 4; 11-13.)

te faaau atoa ra o Paulo te Ekalesia mai te tino taata te huru, ua rau te melo, hoé noa iho ra tino, "I teie nei ra, ua haamanhia e te Atua te mau melo o te tino nei i tana vahi hinaaro ra, ****E ua tuu hoi te Atua i te Aposetolo i roto i te Ekalesia, o mua ia, e te piti ra, e Peropheta ia, te toru ra, e haapii ia, e te rave tapao, e te faaora mai, e te tauturu, e te faaite, e te parau êê'".

E rave rahi atu â te mau irava o tei faaite mai e, ua faatia mau Iesu i te Ekalesia ei orometua ia haapii i te mau taata atoa i te mau hinaaro o te Mesia.

I te mau parau i nia nei, te hinaaro nei au ia faaite ia outou e' o te haamataraa teie o te parau no te 'Taivaraa'. Te ani atu nei au ia outou ia haamanaó e, ua faatia Iesu i Ta'na Ekalesia e te haapiiraa rahi ta'na i haapii atu, oia hoi, ia hoé ta'na mau pipi, ia hoé ratou atoa o tei faaroo i to'na Evanelia; ia riro ratou atoa ei hoé mai oia e To'na Metua e hoé. Haamanaó atoa outou e, ua tonohia Iesu e To'na Metua, oia hoi te Atua, ia faariro te mau taata atoa ei hoé.

I to tatou hiópoaraa i te huru o te mau Ekalesia e vai nei, mai te tau o te mau Aposetolo e tae noa'tu i teie nei ua ite tatou e, ua ere ratou i teie haapiiraa rahi o te Mesia. Te mârô ra ratou i te tahi i te tahi, e ua na reira ratou mai te poheraa o te mau Aposetolo e tae roa mai i teie nei tau ta tatou e ite nei.

I to tatou hiópoaraa ra i teie nei mau mea, a haamanaó outou i teie mea, oia hoi, ia ite outou e aita vau i hinaaro i te faaino atu i te hoé Ekalesia, aita vau e na reira, e faaite ra vau i te huru mau e te parau mau mai te faaitehia mai e te mau ohipa mo'a e te mau buka tuatapapa o tei faariihia e to ao atoa nei. Ua taiva te Ekalesia i faatiahia e te Mesia e Tana mau Aposetolo, e ite ra tatou i te huru i ta te Atua faatia-faahou-raa o tana Ekalesia i nia te fenua nei mai te au i te mau tohu tahito.

Papaihia e Gihoti Borobiti

No Te Mau Tuahine

I te mau Amuiraa Tuahine Faaora, ia ora na outou i roto te aroha o to tatou Fatu o Iesu mesia.

I te avae i mairi aénei ua papai au i te mau parau rii no te faaiteraa'tu i te hoé mau mea e tia ia outou ia haapii i ta outou mau tamarii.

Teie ra avae e tamata vau i te faaite atu ia outou i te hoé mea rahi ae i te mau mea atoa, ia haapii ta outou mau tamarii: oia hoi, te faaroo mau i te Atua e To'na ra Evanelia.

Tei ia tatou te Evanelia, o tei ore i horoahia i te mau taata i rapae i te Ekalesia a Iesu Mesia, e e mea maere taua Evanelia nei no te mea na te Atua ia. Teie ta tatou ohipa rahi, oia hoi, ia faaite atu tatou i ta tatou mau tamarii i te huru mau o teie nei Evanelia tei mauhia e tatou, ia tupu te aroha i roto i to ratou mau aau no te mau haamaitairaa ta te Atua i horoa mai na ratou. Faaite atu outou ia ratou, i te mau tamarii, e na roto i to ratou meloraa i teie nei Ekalesia, e noaa mai te mau haamaitairaa o tei ore i faariihi e to rapae. Faaite ia ratou i to outou iho iteraa no te mana o te Autahuáaraa na roto i te faaroo, e te mau taata ta outou i ite o tei ora na roto i te mana o te Autahuáaraa, oia hoi, te mana o te Atua. Ia na reira outou, te mau metua, e haamaitai te Atua ia outou, e e haamaitai atoa oia i ta outou mau tamarii, e e rahi ae to ratou here ia outou.

Haapii ia ratou i te pure i to ratou apiraa. Haapii ia ratou ia haamaitai atu i te Atua no te mau mea Ta'na i horoa mai no ratou ra.

Tauturu outou ia ratou i te haamaitai i te maa, ia ite ratou i te pure no te reira. Haapii ia ratou ia faatura i te Atua e Ta'na mau Tavini e Ta'na mau fare, ia ore ratou ia hauti i te fare pureraa, e faatura râ ratou i ta'na mau mea ra. Haapii ia ratou i teie nei mau mea ia tupu te aroha e te tiaturiraa i te Atua.

Papaihia e Matarita Borobiti

Te Mau Parau Apî

E TONITARA API

I roto i te vea no te Hau Amerika te faaitehia mai nei e, ua maitihia te hoé taata no Utaha ei Tonitara i te fenua ra o 'Mexico'. E taata maramarama oia, e e taata ite atoa oia i taua huru ohipa ra. E orometua oia i roto i te haapiiraa Sabati i Roto Miti i te matamua, e taata itoito oia i te rave-raa ohipa i roto i te Ekalesia nei. E hoa oia no Gihoti Pere-titeni, o J. Reuben Clark ia to'na io'a.

E TANIUNIURAA API

Ua itehia te hoé taniuniuraa api i Amerika, oia hoi ua tuuhia ra te niuniu paraparau, mai ta tatou i ite i ô nei, i nia i te pahi, e noa'tu te vahi i haerehia e taua pahi ra, nehe-nehe noa i te mau taata ia paraparau i te tahi e te tahi i nia i te fenua e i nia i te pahi atoa hoi. Mai te mea te tere ra te hoé taata i nia i te pahi e nehe-nehe i ta ta'na vahine aore ra to'na mau hoa ia paraparau ia'na mai roto atu i to ratou iho fare, e e faaroo hoi ratou i to'na reó, e e faaroo hoi oia i to ratou mau reó, mai te mea ra e, ua fatata roa ratou i te tahi e te tahi.

E VERO RAHI

I te avae i mairi aénei ua tupu te hoé vero rahi i nia i te moana Atelanatika. Te na ô mai ra te vea no te hau e, ua parari na pahi e hitu ahuru ma pae, e ua pohe e piti hanera taata i taua vero rahi ra. Ua parau mai te hoé raatira o te hoé pahi rahi, o Bremmen ia te ioa, e vero puai ae te reira i te mau vero i itehia e ana ra.


NO TUBUAI

Ua tae mai na orometua no Tubuai mai, e te faaite mai nei raua e, e mea maitai roa te mau ohipa i Tubuai ra, te tupu noa nei te ohipa maitatai i te rahiraa. Te vai ra na Amaa e toru i Tubuai, e ua faatiahia te Pupu no te Feia Api i roto i na Amaa e toru atoa ra. E ohipa api hoi teie i Tubuai ra, e no reira, te faaterehia ra te mau haapiiraa ra, na te mau orometua ia e rave, te vai râ te mahana e horoahia'tu i te reira ohipa ihora i roto i te rima no te Feia Api, e na ratou e rave. Te vai ra na pupu gitara e piti atoa i taua fenua ihora, oia hoi, i te Amaa i Taahuaia, e i te Amaa Haramea, e te rave itoito noa ra ratou i te ohipa faatairaa gitara, noa'tu i to ratou apiraa i taua ohipa ra, e mea navenave roa to ratou faatairaa, e to ratou himeneraa.

NO NIU ZILANI

I te taeraa mai o te pahi vea Tahiti, no Niu Zilani mai, na tae atoa mai na Orometua Momoni no taua feua ra. E toru matahiti ta raua raveraa i te ohipa Orometua i reira, i teie nei te hoi nei raua i to raua fenua ai'a. Ua faaite mai ra raua i te huru o te Ekalesia i reira, e mea maitai roa. Te vai nei e maha ahuru ma pae Orometua no Amerika i reira i teie nei e te rave itoito nei i te ohipa o te Evanelia. E hitu tauatini te rahiraa o to te Ekalesia i reira, e e mea manuia ratou i te haapiiraa atu i te mau feia api i te mau ravea faaapu huru rau.

M. Bonnet M. Gerant et Imprimeur,
Rue Brea et de la rue Dumont d'Urville, Orovini, Papeete



E hohoa teie no te hoé anavai pape i te tufaa fenua
Utaha. Te vai ra iroto i teie anavai i te mau i'a huru rau,
e te rave-noa-hia e te mau taata ravaí.